

## Haki ya Msingi ya Usawa mbele ya Sheria.

TAWLA ipo kwa kukusaidia wewe kuelewa nini hasa maana ya Haki hii.

Endapo una swali lolote, au unahitaji msaada, tafadhali tuandikie "TAWLA", S.L.P. 9460, Dar es Salaam Tanzania.




DESIGN NA MICHORO WALTER LEMA  
(DESIGN AND DRAWING)  
REDISIGN HELMUT PFINDEL

IMEFADHILIWA KWA PAMOJA  
NA ROYAL DANISH EMBASSY  
IMEFADHILIWA NA MEDICAL MISSION SUPPORT  
UNITED STATES INFORMATION SERVICES (USIS)

ZIJUE HAKI ZAKO

# KIKATIBA



IMETOLEWA NA KUTAYARISHWA NA CHAMA CHA  
WANAWA KE WANASHERIA TANZANIA (TAWLA)

## **ZIJUE HAKI ZAKO MUHIMU ZA KIKATIBA**

### **Haki ya kupiga kura**

Kila raja wa Tanzania aliyetimiza umri wa miaka kumi na minane anayo haki ya kupiga kura katika uchaguzi unaofanywa Tanzania na wananchi. Haki hii itatumiwa kwa kufuata masharti ya ibara ndogo ya (2) pamoja na masharti mengineyo ya Katiba hii na ya Sheria inayotumika nchini Tanzania kuhusu mambo ya uchaguzi.

### **Usawa wa Binadamu**

Binadamu wote huzaliwa huru, na wote ni sawa.

### **Usawa mbele ya Sheria**

Watu wote ni sawa mbele ya sheria, wanayo haki, bila ya ubaguzi wowote, kulindwa na kupata haki sawa mbele ya sheria.

### **Haki ya kuwa hai.**

Kila mtu anayo haki ya kuishi na kupata kutoka kwa jamii hifadhi ya maisha yake, kwa mujibu wa sheria.

### **Haki ya Uhuru wa mtu**

Kila mtu anayo haki ya kuwa huru na kuishi kama mtu huru.

### **Haki ya faragha na ya Usalama**

Kila mtu anastahili kuheshimiwa na kupata hifadhi kwa nafasi yake, maisha yake binafsi na familia yake na unyumba wake, na pia heshima na hifadhi ya maskani yake na mawasiliano yake ya binafsi.

### **Uhuru wa kwenda utakako**

Kila raia wa Jamhuri ya Muungano anayo haki ya kwenda kokote katika Jamhuri ya Muungano na kuishi katika sehemu yoyote, kutoka nje ya nchi na kuingia, na pia haki ya kutoshurutishwa kuhama au kufukuzwa kutoka katika Jamhuri ya Muungano.

### **Uhuru wa Maoni**

Bila ya kuathiri sheria za nchi, kila mtu yuko huru kuwa na maoni yoyote na kutoa nje mawazo yake, na kutafuta kupokea na kutoa habari na dhana zozote kupitia chombo chochote bila ya kujali mipaka ya nchi, na pia ana uhuru wa mawasiliano yake kutoingiliwa kati.

### **Uhuru wa mtu kuamini**

Kila mtu anastahili kuwa na uhuru wa mawazo, imani na uchaguzi katika mambo ya dini, pamoja na uhuru wa mtu kubadilisha dini au imani yake.

### **Uhuru wa mtu kushirikiana**

Kila mtu anastahili kuwa huru bila ya kuathiri sheria za nchi, kukutana na kuchanganyika na kushirikiana na watu wengine kwa hiari yake na kwa amani, kuchanganyika na kushirikiana na watu wengine, kutoa mawazo hadharani, na hasa zaidi kuanzisha au kujiunga na vyama au mashirika yaliyoanzishwa kwa madhumuni ya kuhifadhi au kuendeleza imani au maslahi yake au maslahi mengineyo.

### **Uhuru wa kushiriki shughuli za umma**

Kila raia anayo haki na uhuru kushiriki kwa ukamilifu katika kufikia uamuzi juu ya mambo yanayomhusu yeye, maisha yake au yanayolihusu Taifa.

### **Haki ya kufanya kazi**

Kila mtu anayo haki ya kufanya kazi. Kila raia anastahili fursa na haki sawa, kwa masharti ya usawa, ya kushika nafasi yoyote ya kazi na shughuli yoyote iliyo chini ya Mamlaka ya Nchi.

### **Haki ya kupata ujira wa haki**

Kila mtu, bila ya kuwapo ubaguzi wa aina yoyote, anayo haki ya kupata ujira unaoilingana na kazi yake, na watu wote wanaofanya kazi kulingana na uwezo wao watapata malipo kulingana na kiasi na sifa kwa kazi wanayoifanya.

### **Haki ya kumiliki mali**

Bila ya kuathiri masharti ya sheria za nchi zinazohusika kila mtu anayo haki ya kumiliki mali, na haki ya hifadhi mali yake aliyo-nayo kwa mujibu wa sheria.

### **Wajibu wa kutii sheria za nchi**

Kila mtu ana wajibu wa kufuata na kutii Katiba hii na sheria za Jamhuri ya Muungano.

### **Ulinzi wa Taifa**

Kila raia ana wajibu wa kulinda, kuhifadhi na kudumisha uhuru, mamlaka, ardhi na umoja wa taifa.

## **IKUMBUKWE**

Kila mtu katika Jamhuri ya Muungano anayo haki ya kufaidi haki za msingi za binadamu, na matokeo ya kila mtu kutekeleza wajibu wake kwa jamii.

Haki na uhuru wa binadamu ambayo misingi yake imeorodheshwa katika katiba hii havitatumikiwa na mtu mmoja kwa maana ambayo itasababisha kuingiliwa kati au kukatizwa kwa haki na uhuru wa watu wengine au maslahi ya umma.